

28 AUG 1996

Mahathir-saham

ASN SATU MONUMEN PENCAPAIAN NEGARA, KATA DR MAHATHIR

KUALA LUMPUR, 28 Ogos (Bernama) -- Datuk Seri Dr Mahathir Mohamad hari ini menyifatkan kejayaan luar biasa Amanah Saham Nasional (ASN) yang merupakan amanah saham terbesar di dunia sebagai monumen sebenar pencapaian negara.

"Ini bukanlah sesuatu pencapaian yang kecil tetapi amat besar. Kalau nak dikatakan ada monumen, inilah monumen yang sebenarnya," kata Perdana Menteri ketika melancarkan Skim Amanah Saham Wawasan 2020 di Dewan Merdeka, Pusat Dagangan Dunia Putra di sini.

Beliau menyebutkan perkara itu ketika membidas tuduhan-tuduhan liar yang menyatakan kerajaan asyik membuat monumen seperti lapangan terbang terbesar dan tiang bendera terbesar untuk keagungan kerajaan.

"...Tetapi tidak ada siapa yang menyebutkan tentang amanah saham ini yang juga merupakan yang terbesar sekali di dunia," katanya.

Dr Mahathir berkata ASN yang kini mempunyai 4.4 juta pemegang saham dengan nilai asas saham melebihi RM20,000 juta membuktikan kerajaan memberikan perhatian kepada rakyat terutamanya yang tidak mampu mengejar kejayaan dalam bidang perniagaan kerana kurang modal.

Perdana Menteri berkata banyak negara lain yang menghadapi masalah agihan kekayaan antara kaum atau suku kaum yang tidak seimbang telah mengkaji sistem ASN itu sebagai satu cara untuk mengatasi masalah mereka.

Dengan kejayaan ASN dan kemudiannya Amanah Saham Bumiputera, kerajaan bersetuju memperkenalkan Amanah Saham Wawasan 2020 (ASW 2020) yang terbuka kepada generasi muda daripada semua kaum.

Menteri Pengangkutan Datuk Seri Dr Ling Liong Sik berkata skim ASW 2020 itu merupakan sesuatu yang istimewa dalam usaha kerajaan membela rakyat dalam arus kemajuan negara.

"Skim ini bukan saja menggalakkan golongan remaja menabung tetapi objektif murni di sebaliknya ialah untuk perpaduan negara," kata Ling, yang juga Presiden MCA, kepada pemberita selepas pelancaran skim itu.

Menteri Kerja Raya, Datuk Seri S.Samy Vellu pula menyifatkan ASW 2020 sebagai amat baik dan meminta ibu bapa menggalakkan anak mereka menabung dalam skim amanah itu.

Untuk tujuan itu, MIC akan meneruskan kempen di seluruh negara bagi menyedarkan ibu bapa mengenai keistimewaan skim itu, katanya.

-- BERNAMA

AZZ MAI